

# Komited perkasa pendidikan tinggi

UB 10/09/2011 A1  
Oleh NIK JASNI CHE JAAFAR  
nikjasni.ub@gmail.com


**KOTA KINABALU:** Ketua Menteri, Datuk Seri Panglima Musa Aman berkata kerajaan negeri akan terus komited dalam meningkat dan memperkasakan pendidikan tinggi di Sabah.

Beliau berkata, kerajaan juga mengambil pendekatan untuk mewujudkan persekitaran pengajian tinggi mampu melonjakkan keunggulan ilmu seiring hasrat menjadikan Malaysia sebagai pusat kecemerlangan ilmu di rantau ini.

Tambahnya, langkah ini juga bagi memastikan proses menghasilkan graduan berdaya saing, berinovasi, berakhlak mulia dan berkemampuan memajukan negara untuk lebih berdaya saing di peringkat global.

“Pembinaan infrastruktur moden dan canggih seperti di Hab Pendidikan Sandakan adalah antara langkah yang diambil untuk menjana modal insan berkualiti dengan minda kelas pertama,” katanya.

Beliau berkata demikian di Majlis Lafaz Ikrar dan Aku Janji Mahasiswa Baru Universiti Malaysia Sabah (UMS), di sini, kelmarin.



“Pembinaan infrastruktur moden dan canggih seperti di Hab Pendidikan Sandakan adalah antara langkah yang diambil untuk menjana modal insan berkualiti dengan minda kelas pertama.”

**DATUK SERI PANGLIMA MUSA AMAN**  
Ketua Menteri

Turut hadir, Ketua Pengarah Jabatan Pengajian Tinggi, Datuk Prof Dr Rujhan Mustafa, Pengerusi Lembaga Pengarah UMS, Tan Sri Datuk Abdul Hamid Egoh, dan Naib Canselor UMS, Brig Jen Prof Datuk Seri Panglima Dr Kamaruzaman Ampon.

Musa yang juga Pro-Canselor UMS berkata, berdasarkan wawasan dan gagasan itu juga, UMS turut meletakkan sasaran untuk menjadi sebuah universiti bertaraf dunia.

UMS katanya, sentiasa berusaha mencapai kegemilangan akademik dalam pelbagai bidang ilmu serta mendapatkan pengiktirafan antarabangsa melalui pendekatan yang dilaksanakan.

“Usaha ini termasuklah kegiatan pengajaran dan pembelajaran, penyelidikan dan penerbitan, khidmat masyarakat dan keseimbangan ilmu dalam meningkatkan potensi dan nilai diri pelajar,” katanya.

Universiti terbabit ketika ini mempunyai cawangan Kampus Antarabangsa Labuan, Kampus Cawangan Sandakan selain Pusat Penyelidikan di Banjaran Crocker di Kimanis, Pusat Khidmat Kesihatan di Matunggong, Kudat dan Pusat Penyelidikan Marin di Semporna.

UMS juga, tambahannya, sedang mengusahakan Hospital Universiti bagi melengkapkan kewujudan Sekolah Perubatan UMS.

Dalam pada itu, Musa berpesan kepada mahasiswa baru UMS agar menggunakan peluang yang diperolehi sebaiknya untuk menjadi individu yang berkualiti.

“Fokus kepada pelajaran dan patuhi peraturan untuk menjaga nama baik UMS memandangkan universiti ini terkenal di dalam dan luar negara,” katanya.

Tahun ini, UMS menerima 4,437 pelajar dari dalam negara, 135 pelajar dari China, Brunei (9) dan Turki (2).

■ Lagi gambar dan berita di A2



**IKRAR AKU JANJI ...** Sebahagian daripada mahasiswa baru UMS mengangkat sumpah dan ikrar Aku Janji di Dewan Canselor UMS, kelmarin. -Gambar oleh ANIQ AZRAEI